

39-ՐԴ ՆԻՍ

22 նոյեմբերի 1918թ.

Նախագահում է *Ս. Սահակյան*։ մինիստրական օթյակումն են Մինիստր-Նախագահ, արտ[աքին] գործոց, ներքին գործոց և զինվորական մինիստրները։

Նախագահը կարողում է օրակարգը.

1. Օրինագիծ նոր գավառների ադմինիստրացիայի կազմակերպման համար վարկ բանալու մասին.

2. Օրինագիծ ամերիկյան գաղթականական գործերի միսիային մեկ միլիոն ռուբլի փոխարինաբար տալու մասին.

3. Դպրոցական հանձնաժողովի զեկուցումը պետական դպրոցների ռոճիկ-ների մնացորդների մասին.

4. Հարցումներ և հարցապնդումներ.

5. Ընթացիկ հարցեր։

Նախքան օրակարգի մեջ հիշված խնդիրների քննության անցնելը, մանդատային հանձնաժողովի կողմից զեկուցում է տալիս *Գ. Սարգսյանը* և հայտնում, որ հանձնաժողովը ընդունել է մեծամասնականների հրաժարականը և հաստատում է Դարաբեկյանի մանդատը։

*Ս. Հարությունյան* - Աննորմալ է համարում այն երևույթը, որ մեր պետության սահմաններից դուրս գտնված կուսակցական մարմինները տալիս են մանդատներ մեր խորհրդարան եկող պատգամավորներին։ Առաջարկում է վերջ տալ այդօրինակ երևույթին և պիտի ամեն մի կուսակցություն Հայաստանում ունենա իր բարձրագույն օրգանը, որը և միայն պիտի լինի մանդատներ տվողը։

*Գ. Ազատյան* - Բողոքում է այդպիսի առաջարկի դեմ՝ պատճառաբանելով, որ սոց. դեմոկրատիան միայն հայկական մի կուսակցությունն է, այլ միջազգային։

*Ս. Տեր-Մարտիրոսյան* - Ձեկուցում է օրակարգի ա. կետի մասին և առաջարկում քննել այն շտապողաբար, որ և անցնում է։

Օրինագծի հիմունքների մասին արտահայտում են թեր ու դեմ մտքեր։ Խոսում են *Գ. Ազատյանը, ներքին գործոց մինիստրը, Ս. Մամիկոնյանը, Ա. Խոնդկարյանը*։ Օրինագիծը *Գ. ընթերցումով* ընդունում է խորհրդարանը, միայն նախահաշիվը չի քննվում, նկատի ունենալով այն որոշումը, որ արել է խորհրդարանը՝ տալով կառավարությանն իրավունք՝ ծախսելու ընդհանուր նախահաշիվների սահմանում։

Խորհրդարանը միաձայն ընդունում է *Ֆին.* հանձնաժողովի որոշումը ամերիկյան գաղթականական միսիային մեկ միլիոն ռուբլի փոխարինաբար տալու վերաբերմամբ։

Որոշվեց անհետևանք թողնել պետական դպրոցների ուսուցիչների դիմումն իրենց ռոճիկների մնացորդները տալու մասին պետական միջոցներից, քանի որ խորհրդարանը նման խնդրով դիմող ծխական դպրոցի ուսուցիչների դիմումը նույնպես մերժել է։ Միաձայնակ միաձայն որոշվեց խնդիրը հանձնել լուսավորության մինիստրին, որ նա լրացնի թվական տվյալներով և, եթե հնարավոր է, հասարակական և ոչ պետական գումարներով բավարարել ուսուցչության պահանջին։

Տասնհինգ րոպե ընդմիջումից հետո արվում են հարցումներն ու հարցապնդումները, որոնց և կառավարությունը տալիս է իր պատասխանները։

*Ս. Վրացյան* - Լսելով սոց.-դեմոկրատիական ֆրակցիայի հարցումներն ու հարցապնդումները, մենք գալիս ենք այն եզրակացության, որ նրանք, այսինքն՝ սոց. դեմոկրատները, այստեղ նպատակ են դրել հասարակության մեջ վատ տրամադրություն ստեղծել և վարկաբեկել կառավարությանը։ Նկատելի է, առհասարակ, որ քննադատությունն օբյեկտիվ պայմաններից չի բխում, այլ հենց այնպես, տեսականորեն դատելով։ Այդ պատճառով էլ անթույլատրելի ենք համարում այն ձևը, որով տարվում է առհասարակ հարցապնդումը։

Նիստը փակվեց գիշ[երվա] ժ. 10-ին։

«Ձանգ», 22 նոյեմբերի 1918թ.